

TANEE PABLO NAAJIONEE TIMOTEOCUARA

Pablo saruhuatasacari Timoteo

1 ¹Janiyari Pabloni, Jesucristo jiyaramiquishano, taa Pueyaso paniquiaaricuajani. Naacuajitij, janiyari Jesucristojiniji pohuatanara jiyatesa-quiaarini, pueya niishiniuria seetanujuanaa, nojoriiri pueyaracaanu rishijiacara jiyatesaanutaniya Jesucristoo-cua nojori tiuushacari. ²Naaratej quiyanu Timoteonaa, janiyari nio naajiya quiarani. Janiyari quia panitiaani pa Que Pueyaso, pa Jiyaniiija Jesucristojuhuj, nojori cuara cumaquiiria quiajaniya. Naajuhuj, nojori cuara taraajeera quiocua, nojori cuara pueyaracaanu quioojia cajitiriājuhuaj shuquiriaatia quia quiniuria.

**Jesucristojiniji quia
pohuatariquia tamasa**

³Pueyaso cua secojosacari pueyaracaanu, juuca, niucuanio, janiyari quiocuara secojoquiaani. Cua niishiriojosacari quiajaniya, maninia Pueyaso tojjijia quia quiniuucua, janiyari Pueyaso sequequiaani, “paacarasho”. Janiyari nera shitimia poonijioquiaa coojia najiqaatishooni, taa pa supuetanaa tojtiaquiaari Pueyaso-cuaani. ⁴Majaari cua niyjetanu quiquiaa quia nujuquenu cucua, janiya jaara quia shuriucuaji quiaquiaarini. Janiyari cunora jiyanohua jiaatiaa cua niquiniuria quiajaniyani, shuquiriaatiaa cua quiniuria quia shuriucua. ⁵Janiyacuajaari niishiya-

ni quiaari seetanujuanaa pa Jiyaniiijaacua tiuujiacuaja. Quia ji Loida, quia nucua Eunicenio, nojoriiri coteenu-juanaa quiocuaji Pueyasoo-cua tiuujiaa quiquiaari. Majaari cua taacanuunu quiaari seetanujuanaa Jesucristoo-cua tiuujia quiquiaajuhuj, taa nojori quiquiaaricuaani.

⁶Pueyasocujaari na cumaaca niqutio-quiaari quiajaniya, cua secojosacari quiocuara, cua juaashiquia cua niasacari quiocua. Naacuajitij, quiaacuajaari Pueyaso Sohuanu cumaacaraca quioojiajini. Naaratej, Pueyaso Sohuanu quia shanacure quiocua, na cumaaca na poonijiotenura socua quioojiajini.

⁷Pueyasoori maja na niqutionu quiquiaari na Sohuanu, puereja pa quiniuria. Na Sohuanu niqutioquiaari pajaniya cutaraari, cumaacaraca pa quiniuria, panijiaa pa quiniuriajuhuaj, maninia niishiriojuacaranio. ⁸Naacuajitij, majaari quia caririquiniu pa Jiyaniiija Jesucristojiniji quia poojotanura. Naajuhuj, majaari cua naaqui quia caririquiniu, nujuatejojuajini cua pohuatanuucua. Pueyaso cumaquishacari quiajaniya, juhuajaniya quia rejeretare, quiaa jaara naquiya miishaariquiajuhuaj, Jesucristojiniji quia pohuatasacari. ⁹Pueyasocujaari pa jiyatequiaari na pueyara. Nojuajaari pa saquiriojoquiaari saa neraja pa quiniuria. Na jiyanoonu pajaniyani, majaari na quiniu quiquiaari maninia miijiaa pa

quiniuucua juucua. Maja. Nojuacuajaari naa pa jiyanooquiaari saaja naa na miiniu paniniuucua, jiyanoogia na quiniuucujahuaj. Jiya shipiniyaquishacarijia, Pueyasoori jiyacari niishiriojoquiaari taa na jiyanooniutianiya pajaniyani, Jesucristo cusosacari pa niti. ¹⁰Quiari naataja pocuaji Tacuna Jesucristo niniuucua, Pueyasoori pa niishitiquiaari taate na naata jiyanooni pajaniyani. Cunora, Jesucristoori pa niti cusoquiaari. Na samiitiasacariuhua, nojuajaari cusonu shocotaquiaari. Naacujajitij, nocua pa tiuushacari, paari pueyaracaanu rishijiara jiyatesaanutaniyani.

¹¹Pueya niishiniuria nio rupaa, Pueyasoori cunora na jiyaramiquishano pueyanora cua jiyatequiaari, pueya cua niishitiojonura Jesucristojiniji. ¹²Naacujitij, janiyari niya naquiya miya nujuatejojuajiniani. Naajaa, majaari cua caririqiniu. Janiyacuajaari niishiyani canaacua cua tiuquuiarini. Nojuacuajaari pocuaji Tacuna Jesucristo. Cunora, janiyari seetanujanaa niishiyani, nojuajaari cumaacaraca na cojuanura janiya, nojuaja cuaara tiuquiriohuajaati-jia. Naajuhuj, nojuacuajaari cumaacaraca na jataniniuria pajaniya, tojetaarucujanaa quiarinio pueya pa quiniuria na tiuquishacariuhua pocua.

¹³Timoteonaa, maninia niishitiojosano tojjia quia quiriqia taa cua niishitiojoquiaari quiajanuyacuajani. Naa quia miiriquia Pueyaso rupaacua tiuujia quia quishacari, pueya panijia quia quiniuucujahuaj, Jesucristo rupuesano pa quiniuucua. ¹⁴Pueyasocujaari quia niishitiquiaari seetanu rupaajanaa. Pueyaso Sohanu quiniuucua poojiajinia na cumaquiniuria pajaniya, cuno niishitiojosano quia jiitiare maninia, maja tamaatiara na jatanishaanura.

¹⁵Quiaacuajaari tari niishiya, puetunu Asia jiyajinijinio parta Pueyaso pueyari

cua tiujiatuquiaari tamajaaja. Majaari na naacutunu paniniu quiquianu janiya. Nojorijinijinioori quiquianujuhua Figelo, Hermógenesnio. ¹⁶⁻¹⁷Saniniuujia, Onesiforo cutaraari cucua tiuquitiyasucanu. Cunora, pa Jiyaniijia cuaara nocua taraajeera, puetunu na tiajinia quijiacaacujahuaj. Nojuaja jaara Roma tiacajinia tiuquiquianu, nojuajaari ritia coteecanu na pajenura janiya, cuaara cua riuriatare-jaatijia. Jaara cua riuriatacanu, nojuajaari coojia cajitiquianu. Nojuajaari pueyaracaanu cucua tiuquijiocanu niya nujuatejojuajinia, na naacunura janiya. Majaari cucuaji na caririqiniu quiquianu nujuatesano cua quishacari. ¹⁸Quiaacuajaari niishiyajuhuj taa nojuaja naacuquiaari pajaniyacujani, Éfeso tiacajinia pa quishacari. Naa maninia na miiniuucua pajaniyacuaatej, pa Jiyaniijia tiuquishacariuhua pocua, nojuaja cuaara maninia miiria Onesiforo saniniuujia.

Jesucristora poonijiojua quia quiri quia puereyaquiniutia

2 ¹Quiajaniya saniniuujia quianunaa, quioojia quia cumaquiriquia Jesucristo niquitosano cumaacata.

²Nocua tiuushano pueya quiarta Pueyaso pueyajinijinio quia niishitiojore Pueyaso rupaa, nojori niishitiojonura tamasa saniniuujia. Cuno maninia pueya quia niishitiojore puetunu Pueyaso rupaajanaa, taa quia tojjiquiaari queraatia pueya niquiara cua pohuatasacaricuajani.

³Juhujajaniya naquiya miiniu rejeretaja quia quiriqia juhua pa Jiyaniijia Jesucristo soldado, puereyashijia.

⁴Pueyano jaara soldadora saquiriojosaare, cuno pueyanoori maja na naata tama na panishanojuaja miiniu socua. Nojuajaari pueyaracaanu na camarnu tojjia, na camarnu timitianura nojuaja. Naa pa Jiyaniijia tojjia quia quiriqiajuhuaj Timoteonaa. ⁵Naajuhuj, pueya

tacuarishijosacari, nojori cuaara quiiria tacuarishijionu camarnu tojjijaca. Tamonu jaara shocotare na tojyaquiniutia camarnu, cuno na shocotanuuri najuhuanaj. Naacujitij, majaari na niqutiosaanu casaa, sesa na miiniutia na shocotasacari. ⁶Nio quia niishirijihuaj: cante cuhuariquia cuhuatajani, nojuaja cuaara coteenu na senoosanojiniji racataara na panishano. Na nuhuaji cutara, nojuaja na naata tamasaca niqutiojonu na senoosanojiniji. ⁷Nio miriqui cua sequesanoocua quia niishiriojore. Pa Jiyaniijiacuajaari quia niishitiniutianiya puetunujuanaa.

⁸Majaari nio niyajetanu: Jesucristoori macujiniji samiitianishaaquiaariuhua, Pueyaso Niyanu na quiniucua. Pueyano quiquiaarijiaariuhuj. Nojuacuajaari pa supuetanaa jiyaniijia David niqiuohuacujinijo supueno pueyano quiquiaari. Naacujitij, nojuajaari Pueyaso Jiyarosano quiquiaari mijiria quinia pueya niti na mosaanura. Cuncuajaari cua pohuatasaano Pueyaso Rupaa. ⁹Naa cua poojotanuucuatej, janiyari naquiya miyani. Janiyari cumayocuata moronucua quiyajaaniuhuj, juhua sesa miijia. Naajaa, Pueyaso rupaa cutaraari maja na naata sanaajasaanu. ¹⁰Cunora, janiyari puetunu naquiya miiniujianaa rejeretaquiaani, Pueyaso saquiriojosano pueya tojinuria Jesucristojiniji. Naacujitij, nojoriiri na naata nocua tiuuniu, Pueyaso pueyara nojori jiyatesaanurajuhuj, taa na jatanishano pueya pa quiyacuaani. Naacujitij, paari mariyata shacantuuca quijiacara jatanishaanutaniyani, Jesucristota pa quiniuria pueyaracaanu.

¹¹Nio sequesanoori seetanujuanaa:

Jesucristoocua pa tiuushacari,
Pueyasoori Neyanu mosaanu
jiyateya pa niti na quiniuria sesa
pa miishanojiniji. Naacujitij,
Jesucristo mosaanu jaara pocuara

quiquiaari, na samiitianuhuari pajaniyara quiyajuhuj, pueyaracaanu rishiriquiano pa quiniuria. ¹²Naajuhuj, paa jaara naquiya miitiasaariquia nocua pa tiuuniucuanu, nojuajaari camarucua pa jiyatenutaniya narta jiyaniijianucua pa quiniuria. Saniniujia, pa jaara pa Jiyaniijia tamacariquia Pueyaso niishiyashijia pueya niqiarani, nojuajaari pa tamacanutaniyajuhuj. ¹³Paa jaara na sequesano tojiyashijia quiquiaani, naajaa, nojuajaari pueyaracaanu na sequesano miijia. Pueyasoori na sequesano jataniyashijia cutara.

Taamueca quijiate Pueyaso shuquiritiasano nera poonijonani

¹⁴Parta Pueyaso pueya quia niishitiojorohuarohua maja najuhua nojori juayonuujutanura tamaatia niishitiojosanoocua. Jiyanhua quia nacasure nojori Pueyaso niqiuara, maja naa nojori nacojonura najuhua supuetanaa niishitiojosanoocua. Naa tamaatia niishitiojosanoocua juayonuujutanuni, cunoori maja na cumaquiniu na tojiniaa. Socua nojori sesoya cutaraari. ¹⁵Tama quia cuaqueyajaaja quia cojuare, saa maniaja quia niishitiojonura Pueyasojiniji cuno seetanu rupaajanaa. Naacujitij, Pueyasoori quia timitianutaniya nera poonijona maniniu quia quiniucua. Majaari capa quia niishitiojonu, quiaa mariqui tamajaaja caririquiriiri. ¹⁶Naaratej, majaari najuhua tama mijiria pueya niishishanojuaja quia tojinu. Pueya tojishacari cuno, nojoriiri socua jiyacatenutaniya Pueyaso tojiyashijia nojori quiniuria. ¹⁷Cuno najuhua niishitiojosanoori jiyanhua puereeta. Cunoori Pueyaso pueya tajinia paaqueja, na sesonura puetunu Pueyaso pueya

maanujuanaa. Naa nojori tajinia paaqueyari taa pueyano cusojuaja sapueja pueyano cuaqueya moquijiaquiaacuaani, na camaru na cusojuanura. Himeneo, Filetonio, nojoriiri naa miiquioya quiarijia. ¹⁸Nojoriiri seetanu rupaajanaa jataniquianu tamaatiara. Nojoriiri pueya niishitiojiya, paanaari tari tojetaarucuajanaa samiitianishanocuaajani. Naacujajitij, majanaari pa cuaqueya jatanishaanu quiniutianiya, shacantuuca cuaqueyaraca pa quiniuria taa pa Jiyaniijiacuaani. Naa nojori niishitiojosacari najuhuanatej, nojoriiri noojiaqueya Pueyaso pueya cushitiojiya, nojori tiuyaquiniuria pa Jiyaniijia sequesanoocua. ¹⁹Naajaa, Pueyasojuanaacuaajari pa niishitioquiaari na rupaari seetanujuanaa. Majaari na naata jatanishaanu. Naa naajiotasano quiyacuaajari:

“Pa Jiyaniijiaari na saquirojosano pueya niishiyacuaaja”.

Naa naajiotasanoori quiyajuhuaaj:

“Canapuete pa Jiyaniijia Jesucristoo-cua tiuujiacani, nojori cuaara sesa na miijionu tarinitiaara”.

²⁰Sanajanaa, cua tojiri. Jiyanhuaa queraatia casamiriaca pueyano tajinia, cuno tajiniaari maja saaja orojiniji shipinijiosano coshiquia quiniu, miacojuaanio, platajiniji casaanio. Puetunu tamaatia casaajiniji shipinijiosano casamijianaari quijia. Quijiajaariuhua mati, suruhuatu numajiniji quejasano. Quijiajaariuhua maraujiniji panishano patacocua, conaanio. Puetunu cuno casamijinijiojuanaani, noojiaqueyari racatasano saaja masu miaquetejarano quiya, na raatojotajaranonio. Quiyajaariuhua rucucuaacuaaji casaa, rucucua cajitiaja. ²¹Paari naajuhuaaj. Paa jaara tama pa cuaqueyajaaja cojuariquia tojetaarucuaajanaa sesa pa miiniuucuaajini, saaja pa Jiyaniijia pa quiniurajuhuaaj, naacujajitij, pa naata juhua pa Jiyaniijia timitiasano

tohuatashiniyojua quiniu. Naacujajitij, pa Jiyaniijia na naata poonijiotenu pajaniya puetunu maninia casaajanaa pa miiniuria.

²²Sanajanaa, quiaacuaajari niishiya, casaa miiniuucua jiaataajacate mashiquiorini. Puetunu cuno sesa niishiriojosanojuanaa quia tarinitiariquia. Saniniuujia, saaja maninia miijia quia quiriquia. Saaja Pueyaso rupaacua tiuujia quia quiriquia, pueya panijajuhuaaj. Jiyanoojia quia quiriquiajuhuaaj. Naa quia quiriquia, taa puetunu Pueyaso jiyatesano sesa miyashijiaca pueyajanaa miiquiaacuaani, pa Jiyaniijiacuaa nojori tiunuucua. ²³Pueya jaara nacojoriquia nojori niishiyaquishoo casaajiniji najuhuanaj, nojori quia ruuretare saaja, nojori jaara quia nequesoretare cuno casaajiniji. Quiaacuaajari niishiya, pueyari jiyano casaacua paracaatiojua. ²⁴Pueyasora poonijiojua pueyano cuaara quiyaquiriia pueya paracaajia. Saniya cuaara quiriia cutara puetunu pueya panijajanaa. Cuaara quiirijuhua maninia niishitiojua. Cuaara juhujaniya rejeretaja quiiria, tamasaca jaara na taajetere. ²⁵Cuaara Pueyaso rupaa tojiyashijiaca nacasuura jacaria, nojori na paniniutia, maja nojori na juaniutia. Naa quia miishacari, Pueyaso naasucuaari nojori jiuujia tacatonutianiya seetanu rupaajanaa niishijiaca nojori quiniuria. ²⁶Naacujajitij, nojoriiri maninia niishiriojua quiniutianiya, nojori jaaretenura Sesaacuaajia, maja Sesaaca miitiniuria nojori taa na paniyacuaajani.

Taa quijiaa mijiria quinia quiniutianiya quera jiya puequesacarani

3 ¹Quia niishirijuhua Timoteonaa, jiya puequenu panishacari, pueyari socua jiyacatenutianiya sesa mijiacara. ²Pueyari saa tama nerajaaja niishiriojua quiniutianiya. Majaari tamonura na niishiriojonu quiniutianiya. Pueyari

queraatia cumaneeca jitianuucua jiaatiajaca quiniutianiyajuhua. Naajuhua, pueyari najuhua narta pueya niquiara pocuajaca quiniutianiya, na jyanishacari nojori cutara socua niishijiac narta pueyajiniji, socua shanohua niquishano tamasacajinijinio. Pueyari Pueyaso sesacajaca quiniutianiya, narta pueya sesacajacajuhua. Pueyari na queya tojiyashijiac quiniutianiya. Majaari quenaaja pueya timitianu quiniutianiya maninia na mijiaca. Pueyari maninia miyashijiac quiniutianiya, Pueyasojiniji maninia casaa rerequetejaca nojori quiniuucua. ³Naajuhua, majaari quenaaja na queya panijiac pueya quiniu quiniutianiya, tapueyocua, tama necohuaajanio. Pueyari tojetaarucujanaa jyanoyashijiac quiniutianiya. Sacuaraatia rimiaacatuji quiniutianiyajariuhua. Naajuhua, majaari quenaaja tama nojori cuaqueya panishanojuaaja reतेतेजaca pueya quiniu quiniutianiya. Pueyari naquiya narta pueya mijiaca quiniutianiya, nojoricua na taraajeyaquiniutia. Pueyari puetunu maninia mijiacajanaa soojeaca quiniutianiyajuhua. ⁴Pueyari tama na cojiniaajaaja tacartajaca quiniutianiya. Pueyari cocuaatia casaa mijiaca quiniutianiya, mosanucua nojori quiniuucua. Pueyari juhuajaniya quijiaca quiniutianiya, tama nojori cuaqueyajaaja shuquiritiajaca nojori quishacari. Shuquiriaatia pueya miishacari tama na panishanojuaaja pueyaracaanu, majaari jeya nojori quiniu quiniutianiya nojori shuquiritanura Pueyaso. ⁵Pueyari sapuenu juhua Pueyaso pueya niquishaanutianiya. Naajaa, nojori miishanojiniji, maatia niishishaanutaniyari, nojori Pueyaso cumaaca maseyaquiquiaari seetanujanaa jatanishano pueya nojori quiniuria. Cunora cua tojiri Timoteonaa. Majaari jiyano pueya quia rupenutej.

⁶Tamasaca cuno pueyajinijinioni, nojori tiaco tiuquitiajaca, noo maajipohua na sapojonura, najuhua pueya

pohuatasanoocua ritia tiuujiacatej. Cuno maajipohuari tama na cuaqueya miiniu panishanojuaaja reतेतेयashijiac. Naa sesa mijiaca nojori quiniuucuatej, nojori najuhua tacaquiquiaa. Cunora, nojori cuno sapojonuujuaca tojtiaquiaa. ⁷Cuno maajipohuari najuhua pueyacaanu tojtiaquiaa cuno sapojonuujuaca niishitiosano. Saniniuujia, majaari Jesucristojiniji seetanu rupaajanaa niishijiacara nojori quiniu quiquiaa, Pueyaso jiyanooniuria nojori. ⁸Cuno sapuenu juhua Pueyaso rupaa niishitiojonaari seetanu rupaajanaa ruuretaquiaa, taa nio shimiacuri, Janes*, Jambres ruuretaquiaari supuetana Moiséscaani. Naacuajitj, nojori niishitiajari juhua ninishiqui, sesa nojori miishano timitiajaca nojori quiniuucua. Seetanu rupaajanaa nojori tojiyaquiniuucua, pueya cuara tojiyaquiri nojori saniniuujia. Nojoricuajari Jesucristoocua tiyashijiac. ⁹Naajaa, majaari queraatia pueya tiunu quiniutianiya nojoricua. Ritia niishishaanutaniyacujari, nojori seetanujanaa niishiyashijiac, taa pa supuetanaa niishiquiaaricuaano cuno shimiacuri sapojonuujuaca.

**Pablo tucuatascari naajionu,
socua rootaa Timoteori**

¹⁰Timoteonaa, quiaacuajari pueyacaanu cua cojiquiaari maninia quia niishiniuria puetunu cua niishitiosanojuna. Quiaacuajari niishiya taa mijiaca quiquiaarini, pa Jiyaniija cua shuqiritiniuria. Quiaari niishiyajuhua taa seetanujanaa pa Jiyaniijaacua tiuujia cua quiquiaarini, jacaria pocuajajuhua, pueya panijiano. Quiaari niishiyajuhua, majaari cooja cua najiquitiniu quijiani, pueya miishacari naquiya janiya. ¹¹Quiaari niishiyajuhua taa cua miitiasaquiaari Antioquiya tiacajiniani, Iconio tiacajiniajuhua, Litra tiacajiniano. Seetanujanaa, janiyari naquiya miishaacuaarini. Naajaa,

pa Jiyaniijiaari cucua taraajequiaari maninia na rishitiniuria janiya. ¹²Seetanujuanaa naquiya miishaanutaniyari puetunu noo pueyajanaa, tama na cuaqueyajaaja jiyatejaca saaja Jesucristo tojjiaca nojori quiniuriatej. ¹³Saniniuujia, sesa miijiacua pueya, sapojonuujacanio, nojoriiri socua sesa miiniuria jiyacatenutaniya. Nojori sapojonuusacari tamasaca, nojoriiri naa tama na cuaqueyajaaja sapojonutaniyajaacujua.

¹⁴Quiajaniya saniniuujia Timoteonaa, majaari quia cartenu puetunu maninia niishitiojosanojuanaa, taa quia niishitiojosaaquiaaricujani. Quiaacuajaari niishiyaa, cuno niishitiojosanoori seetanu rupaajanaa. Quiaari niishiyajaacuhuaq canapuate quia niishitiojoquiaarini. ¹⁵Quiaacuajaari quia naatujajini tariucuacaanu Pueyaso Rupaa niishijia. Cunoori quia niishitioquiaari Jesucristoocua quia tiuuniuria, Pueyaso jiyanooshano pueyano quia quiniuria. ¹⁶Puetunu Pueyaso Rupaajanaacuajaari Pueyaso naajiotanishano na pueya. Cunora, puetunu cuno rupaajanaari maninia pajaniyara. Cuno rupaari cumaacaraca na niishitiojonura pajaniya, na niishitiniuria pajaniyajuhuaq pa miishanoori sesa, na nacasunura pajaniya maninia miijiacua pa quiniuhuara. Pa rootaajaariuhuaq tojetaarucujanaa maninia miijiacua pa quiniuria. ¹⁷Naacujitij, Pueyaso Rupaari Pueyasora poonijionaa pueya jeenucujaja tojetaarucujanaa, puetunu maninia casaa miijiacajanaa nojori quiniuria.

4 ¹Quiaacuajaari niishiyaa, Jesucristo tiuquishacarihua mijiria, Jiyaniijiajanaa na quiniuria, nojuajaari puetunu na tojitiajacajanaa nequesoreenutaniya mijiria pa miishanojiniji, saminiucua, macunucuanio. Cunora, janiyari na niquiara, pa Que Pueyaso niquiara quia sequeya seetanujuanaani. Cua tojiri.

²Majaari pueya niquiara Pueyaso rupaa

pohuatanu quia tarinitianu. Pueyaracaanu quia pohuatariquia, naajaa, quia jyanishacari jiyacari naasucuaari maja maninia quia pohuatanura. Pueyaso rupaata quia niishitiri sesa miijiacua nojori miishanoori sesa Pueyasora. Pueyaso rupaa tojiyashijiacua quia nacasuriquia. Pueya quia shiniuujiriquia Pueyaso rupaacua nojori tiuuniuria seetanujuanaa. Puetunu cunojuanaa quia miiriquia jacaria quia pocuanuta, maja juaaniutia. ³Naa quia poojotariquia pueya niquiara, nojori tojini panishacarijia Pueyaso rupaa. Na nuhuaji, pueyari seetanu rupaajini niishitiojosano tojini paniaquinutianiya. Saaja na ruoretanutaniyajaariuhuaq. Naa Pueyaso rupaa nojori tojini paniaquishacarijia, nojoriiri queraatia tamaatia niishitiojonuuca rerejotenutaniya, cuno pojori shuquiritiniuria nojori najuhuaa pohuatasana. ⁴Nojoriiri seetanu Pueyaso rupaajanaa tarinitianutaniya, najuhuaa sapojonuusano tojitiajaca nojori quiniuria saniniuujia. ⁵Quiajaniya saniniuujia, maninia niishiriojocua quia quiriquia, maja quia sapojosaanurajuhuaq. Naquiya miini rejeretaja quia quiriquia. Pueyaso rupaa Jesucristojini pohuatanuucua cojeja quia quiriquia, pueya tiuuniuria Jesucristoocua. Puetunu quia poonijosanojuanaa Pueyasora quia tucuatere maninia, taa pa Jiyaniijia sequequiaari quiajaniyacujani.

⁶Janiya saniniuujia, janiyari quera quianutaniya jiyocuaaanu cua quiniuria pa Jiyaniijiatani. Cua nanaca jaara shootesaare, janiyara, cunoori juhua Pueyasora cua niqutiosano quiniutianiya. ⁷Majaari cua taajenu quijia, pueyaracaanu cua poonijosacari cua Jiyaniijia. Janiyari tari tucuataganu miini puetunu na sequesanojuanaani. Pueyaracaanu cua poojotasacari Pueyaso rupaa, majaari cua jatanini quiquiaari quenaaja. ⁸Naacujitij, shanohua tuhuajaari quiriano

jiyocuaaanu racatasano quiya tari, maninia miijia cua quiniuucua. Cua Jiyaniijaari cuno tuhuaja cua niqutionutaniya na samiitianishacariuhua janiya. Pa Jiyaniijaari jiyanoohua maninia. Na jiyanooshano pueya pa quiniuucua, majaari socua na saneenu quiniutianiya sesa pa miishano. Majaari saaja janiya na niqutionu quiniutianiya cuno tuhuaja. Puetunu noo pojorijianaa niqutionutaniyajaariuhuj, canapuate nojuaja na paniniutia sashiyajaani, cuaara tiuquihuara shacantuca na cumaacatajaatijia.

Pablo sequesano Timoteo miishocoriqiano

⁹Majaari puera tarishiniu. Quia secoore, cucua quia tiuquiniuria ritia. ¹⁰Demasri cua tiujiarucuaani. Tesalónica tiacajinia quiaarucuaari. Nojuacuajaari tama na panishanojuaja miiniu panijara jatarohuacuaa. Crecenteeri saniniuujia Galacia jiyajinia quiaarucuaa. Titoori Dalmacia jiyajinia quiaarucuaajaacuhuj. ¹¹Saaja Lucasri niya cuata quiya. Quiaa jaara cumaji niyare, quiocua Marco rupoyare quiocua. Nojuajaari na naata cua naacunu niya, pa Jiyaniijaari cua poonijosacari. ¹²Janiyari saniniuujia Tíquico jiyarorucuaa Éfeso tiacajiniani. ¹³Taa cua sequeya quiajanियacuajani, quiaa jaara cumaji niyare, quiocua cua tucuaque toque paare quiria, Carpo tiajinia cua tiujiasano, Troas tiacajinia. Quiocua quiria patootaare cua nequesoreetunecajuhuj. Janiyari socua noo paniya quia patootanurani, shoqueecua naajionuutasano Pueyaso Rupaatej.

¹⁴Noo Alejandro, cumueeca casaajiniji shipinijiojua casamitij, nojuajaari jiyanoohua cua paracaajara quiqianu. Naajaa, pa Jiyaniijaarujaari saniniuujia cucua na naminiutianiyacuajua, naa na miiniuucua janiyatej. ¹⁵Tama quia cuaqueyajaaja quia cojuare maja na miiniuria sesa quiajanियajuhuj. Nojuajaa-

ri pa pohuatasano cuaracashitiya saaja, Pueyaso rupaa ruuretaja na quiniuucua.

¹⁶Janiya jaara shushajanaa nujuatesaacanu jiyaniijaanucua tacojitij, nojori nequesoreenura janiya, majaari quenaaja tamonu Pueyaso pueyajinijinio quiniuquiriquiaa tii, cucuaji na tacunura quenaaja. Puetunu cua cojiniaajanaari cua cartecanu tamajaaja. Naa nojori tarinitianuucua tamajaaja janiyatej, Pueyaso cuaara jyanooria nojori. ¹⁷Naajaa, pa Jiyaniijaari cua cojiquianuni. Cua cumaquiquianujaariuhuj, nojuajiniji cua pohuatanura puetunu cuniqui quiniaa Pueyaso niishiyashijiaca pueyajanaa. Pa Jiyaniijaari cocuaatia cua miiniuujiniji juhua nojori juaashiquiajiniji cua jaaquianu, maja nojori monura janiya. ¹⁸Janiyari nocua tiuyani, nojuajaari cua mashiquiniutianiya puetunu sesa casaacuajijianaa. Cua cojuanutaniyajaariuhuj, pueyaracaanu rishijia cua quiniuria na shuriucua jiyocuaaanu, Jiyaniijaajanaa na quishacari. ¡Jyanohua maniniaari pa Jiyaniija! ¡Nojuaja cuaara shuquiritiasaaria pueyaracaanu! Cuaara naa quiiriatej.

Pablo sequesano na naajionee na tucuatasaari

¹⁹Quiria quia saruhuatere Prisca, neyaca Aquilano, puetunu Onesiforo pueyajanaajuhuj, na tiajinia quiniaani. ²⁰Erastoori Corinto tiacajinia jateecanu. Janiyari saniniuujia Tróximo tiujiacanu Mileto tiacajiniani, cusosu na quiniuucua. ²¹Cucua quia niniuria quia secoore, shuniya coteyaquishacarijia quia tiuquiniuria cucua. Niya cuata quiniaa parta Pueyaso pueyari cua sequereeni, nojoriria cua saruhuatanaura quiajanिया. Nojoriiri Eubulo, Pudente, Lino, Claudiano, puetunu parta Pueyaso pueya maanujuaanaano.

²²Pa Jiyaniija cuaara quioojiajinia quijia quiriia pueyaracaanu. Pueyaso cuaara cumaquiiria puetunu niajanियajanaa.